

# Peda per la dretga decisiun

La Magistraglia Grischuna vul dar peda a scolaras e scolaras da sa preparar per l'emprendissadi

ANDREAS CADONAU/FMR

■ La conferenza dals Uffizis chantunals da la furmaziun professiunala è sa decida da publitgar las plazzas d'emprendissadi libras pli baud. A las organisaziuns da scolaras e scolaras na plascha quai trend betg. Ellas pretendan temp per scolaras e scolaras da sa preparar sin la vita professiunala. La glieud giuvna che banduna la scola è tschertgada, ella ha strusch fadia da chattar ina plazza d'emprendissadi. Diversas branschas han plitost fadia da recrutar emprendistas ed emprendists. Almain enfin uss n'ha la pandemia betg midà insatge vi da quai fatg. In aspect positiv per giuvnas e giuvenas a la fin da la scola populara. Che la glieud giuvna è tschertgada mussan inserats cumparids dacurt che tschertgan emprendistas ed emprendists gia per l'onn 2022. La Magistraglia Grischuna, l'uniun tetgala da las persunas d'instrucziun, n'ha betg plaschair dal trend dad engaschar emprendistas ed emprendists gia durant il segund onn da la scola superiura. In svilup che procura sulet per pressiu vers giuvenils e geniturs. Per in zichel irritaziun ha la conferenza dals Uffizis chantunals da furmaziun procurà cun sia decisiun da publitgar las plazzas d'emprendissadi passa in onn e mez avant il cumenzament dals emprendissadis.

## Integrà en il plan d'instrucziun

Andreas Spinaz, entaifer la Magistraglia Grischuna responsabel per il stgalim superiur, ha fatg attent al plan d'instrucziun 21. In plan adattà als basegns specifics da scolaras e scolaras che sa preparan da midar en la vita professiunala. Gist il segund onn dal stgalim superiur preveda fufagnadis, scolaras e scolaras emprendan da s'annunziar per ina plazza ed auter. Uschia ch'ils scolaras èn il terz



Emprendistas ed emprendists èn vinavant tschertgads, per avantatg da la giuventetgna a la tschertga dad ina professiun.

FOTO SWISS SKILLS

e davos onn da scola madirs da sa decider e sutscrivere in contract. «Sa decider memia baud na porta nagut.» Andreas Spinaz fa attent a scolaras e scolaras che stoppian avair peda da fufagnar en pliras clamadas e peda da sa preparar per l'emprendissadi. «Uschiglio sa decidan els tgunsch fallà.» Per Andreas Spinaz porta ina decisiun faussa era nagut als manaschis. «Tant pli sche l'emprendissadi vegn interrut.» Scolaras e scolaras che possedan baud in contract d'emprendissadi perdan magari il gust d'emprer durant il davos onn da scola. In impurtant onn da scola, tenor Andreas Spinaz, era per cuntinuar en la scola professiunala. «Era qua preveda il plan 21 scolaziun individuala adattada als basegns da scolaras e scolaras.»

## Ina malchapientscha

Il manader da l'Uffizi per la furmaziun professiunala, Curdin Tuor, ha regurdà a la novitad derasada da ses uffizi en connex cun in «gentlemen's agreement». Ina cunvegna senza valur legala instradada avant blers onn per pussibilitar a giuvnas e giuvenas da sa preparar senza pressiu sin l'emprendissadi. La cunvegna intimescha ils manaschis da betg sutscrivere contracts d'emprendissadi avant l'emprim da november. L'uffizi scriva dad ina atgna dinamica dal martgà uschia che blers manaschis na sa tegnian betg pli vi da la cunvegna. L'uffizi saja sa decida da betg mantegnair a moda artificziala la cunvegna. Vinavant ha Curdin Tuor visà a la posiziun da la conferenza dals Uffizis per la furmaziun

professiunala che scriva dad ina malchapientscha. La decisiun da publitgar las plazzas d'emprendissadi quatter mais pli baud sin l'atgna plattafurma LENA na saja betg succedida per intimar da tschertgar pli baud ina plazza d'emprendissadi. Ins haja sulet vuli infurmar ad uras scolaras e scolaras e geniturs tge plazzas d'emprendissadis che stettian a disposiziun per fufagnar.

## Intermediaturs privats

S'annunziar online per ina plazza via LENA pon ins vinavant pir in onn avant il cumenzament da l'emprendissadi. Sper la plattafurma LENA, finanziada dals chantuns, sa porschan instituziuns privatas per intermediar emprendissadis. Ellas fan quai fitg progressiv e gudognan daners cun lur servetsch, restricziuns era perturgant il diever da datas n'existan nagins vers ils intermediaturs privats.

## Examens sco usità

(rtr) En il Grischun sa preparan il mument 1872 emprendistas ed emprendists sin lur examen. Cun la situaziun actuala n'è quai per blers dentant betg uschè simpel. Tscherts manaschis cun emprendists èn numnadain amez il lockdown. Tenor il manader da l'Uffizi per la furmaziun professiunala dal chantun Grischun saja la devisa quest onn da pussibilitar da far ils examens finals uschè normal sco pussibel. Spustar ils examens u far examens pli simpels na saja nagina schliaziun. Quai fasschess be pli grev ad ils emprendists ed a las emprendistas da fitgar pe en lur via professiunala.